

M514: Reinmar von Zweter

- 1,1 ich sagete iuch gerne nû hoert waz .
 1,2 diu wâre minne got bedwungen hât . unde merkent daz .
 1,3 erbermede unde güete . di klageten gote wir wâren gar verloren .
 1,4 di wâre minne gote entbôt .
 1,5 daz er uns sante sînen sun her nider in den tô .
 1,6 unde uns von helle erlôste . dâr zuo hæte in diu wâre minne erkoren
 1,7 nû sehet alsô gewaltic ist diu minne .
 1,8 verswîge ich daz wâr tæte ich mîne sinne .
 1,9 in dwanc sîn gotelîchiu wirde .
 1,10 daz er uns mennischen wart genôz .
 1,11 der küninc ob allen künigen grôz .
 1,12 der ervulte gar der wâren minne ire giredede .
- 2,1 dô wonete ein maget ûf erde hier .
 2,2 di sante ire boten ûf nâch gotes sune nû merkent wie .
 2,3 ire kiusche unde ire diemüete . ire zuht ire scham . ire grôze reinicheit .
 2,4 di ladeten got mit ganzer kraft .
 2,5 alsô daz er ir sante di hôchgelobeten boteschaft .
 2,6 daz si in maget gebere . daz wart ir von dem engele dô geseit .
 2,7 dô di boten di lieben mære vernâmen .
 2,8 unde si in ganzen gelouben des bequâmen .
 2,9 der heilige geist der entvienc sô schône .
 2,10 daz kint mit manigen tugenden sô .
 2,11 daz wonete under ire brüsten dô .
 2,12 unze si in gebar . waz geben wir ir ze lône .
- 3,1 dô got her in erde wolte komen .
 3,2 unde in gebar ein reine maget / di er im ze muoter hæte genomen .
 3,3 dô huop sich unser sælde . an sînem lîbe huop sich ungemach .
 3,4 an dem vrônen kriuze leit er den tô /
 3,5 dâ mite er uns erlôste ûz grôzer angest . ûz grôzer nô .
 3,6 er gewan uns sæliclîchen / mit allem rehte er dô di helle zerbrach .
 3,7 dô erschein ein licht daz sante er uns ze trôste .
 3,8 dâ mite er vile manige sêl erlôste .
 3,9 sîn güete diu werde uns noch ze teile .
 3,10 unde ouch sîn bluot êr wir vervarn .
 3,11 daz uns di sêl sol bewarn .
 3,12 mit vröuweden dort in êwiclîchem heile .

- 4,1 Adâm . unde manic verloren sêl .
 4,2 vröuwete daz in der helle dô der engel Gabrîêl
 4,3 “avê” – kündet . daz reine wort unde si in maget gebar .
 4,4 den hôchgelobeten reinen got .
 4,5 des mennischheit an dem kriuze / leit den tôt nâch dem gebote .
 4,6 als in di minne lêrte . unde im gebôt / daz wart ervüllet gar .
 4,7 sîn sündenblôzer lîp der lie sich toeten .
 4,8 sîn unschuldic tôt half uns ûz noeten .
 4,9 er brach di helle nâch sîner urstende /
 4,10 dô wart vile manic sêl erlôst .
 4,11 nû biten ich dich vile süezer trôst .
 4,12 daz dû mir gebest wâre riuwe vore mînem ende
- 5,1 got vater dîner manigen tugende .
 5,2 unde dînes sunes . di der begangen hât in sîner jugende .
 5,3 der ne ist kein sô kleine . si en sî mennischlîchen lobe noch zuo grôz .
 5,4 der tugende hân ich eine mir gar ûz erwelt .
 5,5 di selben tugende lobe ich hêrre an dir .
 5,6 wan si ist alsô grôz / daz si dir hêrre selben ist genôz
 5,7 si was ie unde ist noch dîn râtgebinne .
 5,8 ob allen tugenden gar ein kûninginne .
 5,9 mit hulden muoz ich dir si nennen .
 5,10 ez ist dîn reine barmicheit .
 5,11 di unser tagelîchez leit .
 5,12 dich hêrre tuot genædiclich erkennen .
- 6,1 got vater sun heiliger geist .
 6,2 dû aller guoten dinge aneenge . unde ende weist /
 6,3 dich gebar von einem worte . ein rein maget nâch muoterlîcher trahte .
 6,4 di geburt dir einen wole gezam .
 6,5 dîn mennischheit an dem kriuze den tôt durch uns an sich nam .
 6,6 dû erstüende an dem dritten tage . dîn tôt den unsern sô verwant .
 6,7 swer dâr an zwîvele der gedenke an di wunder .
 6,8 di dû tæte unde vore den juden besunder .
 6,9 unde geloube dîne drî namen dich eine .
 6,10 daz dîn gewalt ist âne zil .
 6,11 hilf mir des ich dich biten wile .
 6,12 daz riuwe unde bîhte mich von sünden reine .
- 7,1 got aller guoten dinge ursprinc .
 7,2 got aller wîte unde aller lenge ein umbegênder rinc .
 7,3 got aller hoehe ein dach . got aller tiefe ein endelôser grunt .
 7,4 sich hêrre ûz dîner gottheit
 7,5 her abe in dînen tiuren kouf . der kristenheit leit .
 7,6 durch dînen eingeboren sun der an dem kriuze wart verwunt .
 7,7 mit sînem bluote mehelte er uns zuo briuten .
 7,8 dîn hantgetât solet dû noch hêrre triuten .

- 7,9 durch den der uns dâ hât gevrit .
7,10 von helle unde von des tiuvels kloben .
7,11 den sulen wir hêrre mitsament dir loben
7,12 vûre einen got . des namen sint gedrît .
- 8,1 Jêsus dû gotes wunder bote .
8,2 Jêsus dû mennischenkint unde got . unde ebenmehtic got .
8,3 dû himelsippe vaterhalben . dû erdesippe muoterhalben .
8,4 dû vaterhalben Johannis . ar .
8,5 – – muoterhalben . – mennische gar .
8,6 hier mit bezeichnenunge an – stât geformet als ein kalp .
8,7 di vier êwangeliste unde ire bilede .
8,8 sint ungelêrten liuten gar ze wilde .
8,9 waz ar . waz – . waz mennische meine .
8,10 waz kalp bediute an – stat .
8,11 der âne Krist ie missetrat .
8,12 wære im daz kunt . der wûrde gar zwîvels eine .
- 9,1 – mennischen bilede hât .
9,2 wie got ein mennische wart . von im uns daz geschriben stât .
9,3 in manigem êwângêlie di got selber sprach durch sînen munt .
9,4 wie got alsam ein kalp vertruoc /
9,5 den tôt an der mennischheit . wie man in an daz kriuze sluoc .
9,6 daz machet – kalp mit sîner schrifte von Kristes tôde uns kûnde .
9,7 wie er von tôde erstuont mit lewen krefte .
9,8 daz schrîbet – – mit meisterscheffe .
9,9 Johannis ar von der goteheit .
9,10 di hôhen wîsheit niht entspart .
9,11 in arn wîse gotes himelvar .
9,12 dô gap unde gît noch maniger sêle geleite .
- 10,1 got hêrre swes dû an uns gerst .
10,2 des mûgen wir dich niet wole gewern . ê daz dû uns gewerst .
10,3 wilt dû von uns reine gedenke reinen muot . unde reinez leben .
10,4 wâ sulen wir hêrregot daz nemen .
10,5 dîn reinicheit . di welle uns reinen sô daz wir zemen .
10,6 wilt dû daz wir nâch dînem willen leben . den willen muost dû uns geben .
10,7 wer kan iht guotes âne dich beginnen .
10,8 wes herze mac dich sunder dich geminnen
10,9 wie kunnen wir hêrre dir geleisten .
10,10 iht guotes âne dîn volleist .
10,11 di uns ze gebene hât dîn geist .
10,12 den selben geist lâ hêrregot uns geisten .
- 11,1 got hêrre gip uns hiute heil .
11,2 sô daz uns mûeze werden alles des gebetes ein teil .
11,3 des hiute wirdet gesprochen . sô wît di kristenheit begriffen hât .
11,4 vater unde muoter mîn .

- 11,5 bruoder unde swester . sulen ouch dâr inne sîn .
 11,6 dâr zuo mîne mâge über alle di mîn gebet zuo rehte stât .
 11,7 dâr zuo sô wünsche ich des den kristen allen .
 11,8 daz si mit houbetsünden iht vervallen .
 11,9 unde daz wir werden alsô ervunden .
 11,10 sô got an dem gerihte stê .
 11,11 daz wir vore iemer wernder wê .
 11,12 mit sîner kraft . des tages dâ werden entbunden .
- 12,1 ahî wie wünniglich ein schar .
 12,2 dâ di vile reine trinitâte in ein gesamenet gar .
 12,3 zuo voller anegesichte unde ouch di edele muotere bî gestât .
 12,4 di aller güete ist übervluot .
 12,5 ich meine Kristes muoter . di dâ bezzer ist danne guot .
 12,6 prophêten . patriarchen . der engele schar ouch dâ vile schoene hât .
 12,7 zwelivboten unde vier êwangelisten .
 12,8 marterære . unde andere guote kristene .
 12,9 bîhtære . megede . witewen . vrouwen .
 12,10 unde alle gotes heiligen gar .
 12,11 hêrregot nû hilf uns dâr .
 12,12 daz wir si dort mit vröuweden müezen schouwen .
- 13,1 got hêrre vater dâ dû bist .
 13,2 gewaltic in dem himele . unde ouch alles des dir ist .
 13,3 geheiligt werde dîn name . zuo müeze uns komen ouch daz rîche dîn .
 13,4 dîn wille werde dem gelîche .
 13,5 ervollet ûf der erde . reht als in dem himelrîche .
 13,6 unser tagelich brôt . daz gip uns hêrre als wir des dürftic sîn .
 13,7 vergip uns armen alle unsere schulde .
 13,8 als dû wilt daz wir durch dîne hulde .
 13,9 vergelten swaz wir ie genâmen .
 13,10 swie grôz aber unser schulde sî .
 13,11 di loese uns hêrre unde mache uns vrî .
 13,12 durch dînen tôt . vore allem übele . âmen .
- 14,1 ich wile iu singen nû merkent daz .
 14,2 von unserre vrouwen lobe . daz wir si êren desten baz .
 14,3 von küniges künne ist si geboren . des müezen mir di wîsen jehen .
 14,4 got der geschuof nie niht sô klâr .
 14,5 si überlûhte ez allez . daz ist endelîchen wâr .
 14,6 sô kiusche unde ouch sô reine
 14,7 wart nie küniginne mê gesehen
 14,8 si en kan niet zürnen . si kan vile wole süenen .
 14,9 si machet manigen durren muot vile grünenen .
 14,10 ire süeze süezet alle siure
 14,11 der himel unde erde was ze grôz .
 14,12 den entvienc diu vrouwe in ire schôz .
 14,13 nû sprechent an . wâ wart ie maget sô tiure .

- 15,1 ôwol dir Gabrîêles munt
 15,2 dû tæte ein kint der reinen minniclîchen sûezen kunt .
 15,3 daz ist reiner herzen wûnne . unde kristenen sêln ein iemer werenter hort .
 15,4 ez was der sûeze Emanuel .
 15,5 den dû – . kuntest vile werder engel Gabrîêl .
 15,6 got mit uns des gûete . wart nie vollobet von mennischen zungen worte .
 15,7 wole uns der grôzen êren . daz der reine .
 15,8 got wart mennischenkint mit uns gemeine .
 15,9 im wart vile maniger hande swære .
 15,10 âne sünden broede bekant .
 15,11 Jêsus Krist ist er genant .
 15,12 – sun der sûeze unde vrôuwedenbære .
- 16,1 grôz wunder daz uns ist geschehen .
 16,2 von einer maget des mir alle kristen mûnzen jehen .
 16,3 den himels wîte nie umbevienc . di doch nie ende gewan .
 16,4 noch mit der hoehe in umbevienc .
 16,5 noch mit der wîten tiefen gruntelôser helle nie .
 16,6 den umbevienc ire kleiner lîp . dâ merkent wunder an .
 16,7 si leite in minniclîchen zuo ire schôzn .
 16,8 waz wonders mac dem wunder sich genôzen .
 16,9 kintlîchen leite er sich ze ire brusten .
 16,10 muoterlîchen sougete si in .
 16,11 si wante ire ougen dicke dâ hin .
 16,12 wir haben ez dâ vûre . si halste in unde kuste in .
- 17,1 nû sî vrouwen Even diz verklaget .
 17,2 sît daz got ist worden got von einer reinen maget .
 17,3 di maget ist muoter worden . sô daz ire magetlich êre ist ganz beliben .
 17,4 ire kiusche wîz liljenglanz .
 17,5 ist unverwest . unde ouch sîn gotelich vlamme ganz .
 17,6 sô minniclîcher orden wart nie von muoterlîbe mêr geschriben .
 17,7 si hât den starken got uns überwunden .
 17,8 daz sîn gewalt ist sô von ir gebunden .
 17,9 daz er niht wan genâde biutet .
 17,10 vride unde stæte suone er gît .
 17,11 waz êren an ire kiusche lît .
 17,12 nû wole im wart der si von herzen triutet .
- 18,1 – kûninginne hêr .
 18,2 lâz uns geniezen daz vile dicke der wîselôsen her .
 18,3 gert vrouwe dîner helfe . nû hilf ouch uns durch alle di vrôuwede dîn .
 18,4 der ich dir vûnve nenne hier .
 18,5 diu êrste . daz dîn heilic lîp den vile hôhen gruoz entvienc .
 18,6 den dir der engel brâhte . daz dû gotes muoter soletes sîn .
 18,7 di ander / daz dû Jêsen Krist gebære .
 18,8 die dritte daz dû in grôzen vrôuweden wære .

- 18,9 dô man dir sagete sîne urstende .
 18,10 di vierde was sîn himelbart .
 18,11 di vünfte dir gekündet wart .
 18,12 dô er dich heime vuorte âne missewende .
- 19,1 ez ist vile manigem minnære leit .
 19,2 ob iemand sîner vrouwen dienet ûf genædicheit
 19,3 wande er wile eine ir einer dienen umbe ire hulde unde umbe ire gruoꝝ .
 19,4 nû grîfen alle kristenen zuo .
 19,5 unde dienen mîner vrouwen . dienen spâte unde dienen vruo .
 19,6 mit mînem guoten willen . si tuot in allen aller sorgen buoꝝ .
 19,7 der dienær sol keiner den andern nîden .
 19,8 si sulen alle unkiusche ouch gar vermîden .
 19,9 si ist rein . si en muotet niet wan reines .
 19,10 ir wonet di wære minne bî .
 19,11 si ist alles wandels vrî .
 19,12 er sælic man dem si gewinket eines .
- 20,1 swer gerne minniclîchen lige .
 20,2 unde in den selben vröuweden doch den sünden an gesige .
 20,3 den wîse ich an ein bette dâ er vile maniger vröuweden nietet sich .
 20,4 lege sich ûf sîne baren kniee .
 20,5 unde ruofe tougenlîchen zuo der maget di sünde nie begie .
 20,6 spreche anders niht wan “vrouwe durch dîne grôze güete erhoere mich ..”
 20,7 wie kunde er baz geligen unde geminnen .
 20,8 mac er di vrouwen erwerben unde gewinnen .
 20,9 diu kan wole wernte vröuwede machen .
 20,10 ire güete vröuwet ie baz unde baz .
 20,11 ire güete wirdet . sîn matraz .
 20,12 sô wirdet ob im ire güete sîn deckelachen .
- 21,1 dû sünden blôz dû valsches bar .
 21,2 dû himelvrouwe gewaltic über al der engel schar .
 21,3 des himels unde der erde . und des swes dîn kint dâr inne begriffen hât .
 21,4 dû Kristes muoter reine maget .
 21,5 dû erliuhtes vinstere naht . als si mit sunnen sî betaget .
 21,6 dû gruntveste stæter triuwen . dû schirmærinne gotes hantgetât .
 21,7 dû süenærinne kristenen . juden heidene .
 21,8 di wole daz übel kan zuo guote bescheiden .
 21,9 dû portenærinne vore hellebanden .
 21,10 gar süntær trôst dîne helfe ich spüre .
 21,11 dû unde dîn sun der helle stiure .
 21,12 sint unser schirm . vore sünden unde vore schanden .
- 22,1 gegrüezet sîs dû küniginne .
 22,2 – voller tugende . ein durchliuhtiger sunnenschîn .
 22,3 dû bist ouch volliclîchen . aller vröuwede ein êwiclîcher hort .
 22,4 unser hêrre sî mit dir .

- 22,5 sô daz ir mit einander beide sît genædic mir .
 22,6 unde von mir sûntære ruochet vernemen mâniu klagentiu wort .
 22,7 dîne hôhe genâde vrouwe an mir erzeige .
 22,8 êr mich die wîl des tôdes angest neige .
 22,9 gebenedît vore allen wîben .
 22,10 sî dîn reiner kiuscher lîp .
 22,11 dû muoter maget unde niet ein wîp .
 22,12 gesegenet sî dîn vruht vore allen lîben .
- 23,1 er ist ein sældenrîcher man .
 23,2 der mit stætem dieneste wile wesen vrouwen undertân .
 23,3 ob sich des underwintet ein reine wîp di rehter mâze pfliget .
 23,4 sûmlîche sint aber sô gemuot .
 23,5 swaz si hiute prîste daz si daz morgene dunket guot .
 23,6 wie sol man den gewarten . den hât unmâze volliclîchen ane gesiget .
 23,7 diu eine minnet brennen diu andere rouben .
 23,8 disiu minnet den vrenchen di eine den touben .
 23,9 sumelîche wellnt zuo den hõvischen pflihten .
 23,10 sûmlîche minnent di tumben gar .
 23,11 eteslîche nement der rîchen wâr .
 23,12 er sælic man der sich dâ mac verrihten .
- 24,1 gedinge hoehet mir den muot .
 24,2 nû nidert in ein sorge . di mir vile dicke unsamfte tuot
 24,3 swenne ich in hôhem wâne mit vrõuweden bin . sô trûebet mich ein leit .
 24,4 den wehsel trîbet mîn gedanc .
 24,5 hin unde her . der zwîvel mich ie herziclîchen dwanc .
 24,6 kunde ich mich des vereinen mit dir daz si sô lange mir verseite .
 24,7 hõrte ich ein suezerez jâ noch von ire munde .
 24,8 daz si vile minniclîchen sprechen kunde .
 24,9 diu reine sûeze wolegetân .
 24,10 daz næme ich vûre ein wârez nein .
 24,11 daz wort ist herter danne ein stein .
 24,12 swâ es vile geschihet . dâ wirdet man vriundes âne .
- 25,1 Tristram der leit vile grôze nôt .
 25,2 von eines wîbes minne lac er vile jâmerlîchen tôt .
 25,3 daz quam von sînen triuwen di selbe minne ûz eineme glase er tranc .
 25,4 daz selbe ouch ich getrunken hân .
 25,5 ûz mîner vrouwen ougen . dâ von ich in grôzen kumber stân .
 25,6 des mac mir niet gehelfen des meien schîne . noch kleiner vogellîne sanc .
 25,7 si hât mich verwunt alsô sêre .
 25,8 durch mîn herze . mit ire minnengire .
 25,9 ez en sî daz mich noch ire trôst heile .
 25,10 ich wære anders schiere tôt .
 25,11 wande ire vile suezere munt sô rôt .
 25,12 der werde noch mir senendem manne zuo teile .

- 26,1 vrouwe mîner vröuweden heil .
 26,2 mînes lîbes wünne . unde aller mîner sælden teil .
 26,3 dîn güete mich des bedwinget daz ich dir iemer spriche lobes wort .
 26,4 ob allen vrouwen sælic wîp .
 26,5 mit wîplîcher güete . minniclîcher schoener lîp .
 26,6 der wirdicheit ein bluome wîplîcher zuht unde êren ganzer hort .
 26,7 dîn rôter munt . dîn liechter ougen blicke
 26,8 habent mich verleit in der minne stricke
 26,9 sô daz ich herze unde al di sinne
 26,10 in dîne genâde hân gegeben .
 26,11 swie dû wilt sô wile ich leben .
 26,12 ich bin dîn dienest . dû mîn gebietærinne .
- 27,1 sich umbe dich vile sælic wîp .
 27,2 in mînem herzen vindes dû iemannd dâ wan dînen lîp .
 27,3 sô lâ mich gar verderben . mit ungenâden an mîn ende leben .
 27,4 sîst aber dû dâ gewaltic mîn .
 27,5 vile sælic wîp . sô lâ mich baz in dînen hulden sîn .
 27,6 ich en kan niet wole gewerben . dîne tugende habent mîn herze dir gegeben
 .
 27,7 daz hâs dû sælic vrouwe gar durchgangen .
 27,8 ich hân dich dicke schône dâr in gefangen .
 27,9 sô ich sô liep an dich gedâhte .
 27,10 sô wart mir eine wîle baz .
 27,11 dâr nâch ich dicke trûric saz .
 27,12 diz kurze liep mir langez leit ie brâhte .
- 28,1 sît triuwe ist al der werlte guot .
 28,2 sît triuwe ist aller sælden dach . getriuwelîchen . muot .
 28,3 hân ich gegen der vile guoten . di mînes herzen küniginne ie was .
 28,4 unde iemer muoz âne ende sîn .
 28,5 mir liep vore allen vrouwen liep unde liep diu vrouwe mîn .
 28,6 si minniclich si guote . mîn triuwe ist vester danne ein adamas .
 28,7 gein ir . si ist mînes wunsches paradîse .
 28,8 unde mîner wünne gar ein blundez rîs .
 28,9 unde mînes alters ein süeziu jugende .
 28,10 mîner sælden ein hôher vunt .
 28,11 mîner vröuwede ein wernter grunt .
 28,12 mich troestet ire schoene . ire kiusche . unde ouch ire tugende .
- 29,1 der guoten wîbe wirdicheit .
 29,2 wile ich mit Worten unde mit sange iemer gerne machen breit .
 29,3 von getriuwes herzen grunde durch die vile herzenlieben vrouwen mîn .
 29,4 an der mîn hôheste vröuwede stât .
 29,5 ire kiusche . ire schoene . ire minniclîcher lîp beslozen hât .
 29,6 mîn herze sît der stunte daz mich entvienc ire liechter ougeschîn .
 29,7 dâ wart ich als minniclich entvagen .
 29,8 dâ von mîn trûren was vile gar zergangen .

- 29,9 swâ si nû sî di minniclîche .
29,10 si ist mir in dem herzen bî .
29,11 ire lîp ist alles wandels vrî .
29,12 dâ von bin ich an hôhem muote rîche .
- 30,1 wir wellen daz diu minne sî .
30,2 in dem wâge . unde ûf der erde . unde ouch den luften bî .
30,3 dâr zuo in himelrîche sô ist si werde di minne unde ouch vile liep .
30,4 sît si der meisterschefte pfliget .
30,5 daz si den hôhen kûningen alsam den armen an gesiget
30,6 sô en darf ouch ich niet zûrnen . unde stilet si mir gedanc alsam ein diep .
30,7 nû merkent daz ob man di minne sehe .
30,8 waz man ir gewalt danne jehe .
30,9 sît si sô tougenlîchen wunden .
30,10 kan beidiu wîp unde manne .
30,11 diu minne wole gevüegen kan .
30,12 liep unde leit daz maniger hât bevunden .
- 31,1 alle schuole sint gar ein wint .
31,2 wan diu schuole aleine . dâ di minnære sint .
31,3 di ist sô künstewîse daz man ir muoz der meisterschefte jehen .
31,4 ire beseme zemete sô wilden man .
31,5 daz er nie gehôrte noch gesach daz er daz kan .
31,6 ich wæne niemandd sô hôher schuole habe gehôrt oder gesehen .
31,7 di minne lêret di vrouwen schône grüezen .
31,8 di minne lêret manigen spruch vile süezen .
31,9 di minne lêret grôze milte .
31,10 di minne lêret grôze tugende .
31,11 di minne lêret daz di jugende .
31,12 kan rîtærlich gebâren under schilte .